

Nd.

640. Frumvarp til laga

[210. mál]

um leigunámsheimild á landsvæði úr afréttarlandi jarðarinnar Garða á Álftanesi.

Flm.: Gunnar Thoroddsen, Jóhann Hafstein.

1. gr.

Ríkisstjórninni heimilast að taka úr leigu og afhenda Reykjavíkurbæ endurgjaldslaust um 220 ha landsvæði úr afréttarlandi Garða á Álftanesi sunnan Heiðmerkurgirðingar. Landsvæði þetta takmarkast þannig: að suðaustan af 500 metra línu í beinu áframhaldi af núverandi girðingu á suðausturhlið Heiðmerkur; að suðvestan af beinni línu úr endadepli suðausturmarkalinunnar í Gjáarrétt við landamerki Vífilsstaða og Garða; að norðvestan af landamerkjum Vífilsstaða og Garða að núverandi vesturhlið Heiðmerkur; að austan af núverandi Heiðmerkurgirðingu að vestan.

Landspildan leggist til Heiðmerkur.

2. gr.

Um framkvæmd leigunámsins skal fara eftir ákvæðum laga nr. 61 14. nóv. 1917.

3. gr.

Lög þessi öðlast þegar gildi.

Greinargerð.

Jörðin Garðar er ríkiseign, en er nú í ábúð margra bænda. Garðar eiga frá fornu fari allstórt afréttarland, og er þetta nyrzti hluti þess. Þótt stærð þessa lands sé um 220 ha, er mikið af landinu blásið, og er þar vart meira en sumarbeit 50 kinda.

Skógræktarfélag Reykjavíkur telur, að nauðsyn beri til að leggja landspildu þessa undir Heiðmörk og nota eins og hana til skógræktar. Landið er mjög vel fallið til slíkra nota, bæði vegna jarðvegs og skjóla. Ráðgert er að leggja hluta úr Vífilsstaðalandi til Heiðmerkur, og þegar það hefur verið gert, mundi þetta land mynda geira inn á milli núverandi Heiðmerkurlands og lands þess, er taka á úr landi Vífilsstaða. Skógræktarfélagið telur mikilsvert til að fá samfellt friðað land, að spilda þessi fáist.

Frv. þetta er flutt í samráði við hæstv. landbúnaðarráðherra.

## Fylgiskjal I.

### SKÓGRÆKTARFÉLAG REYKJAVÍKUR

Reykjavík, 16. janúar 1953.

Með tilvisun til samtals Hákonar Bjarnasonar skógræktarstjóra og Einars G. E. Sæmundsen í dag við hæstvirtan landbúnaðarráðherra vil ég leyfa mér að spyrjast fyrir um, hvort hið háa ráðuneyti vilji fyrir sitt leyti samþykkja, að ca. 220 ha landsvæði úr afréttarlandi Garða á Álftanesi sunnan Heiðmerkurgirðingar (sem markað er á meðfylgjandi uppdrátt) verði lagt til Heiðmerkur, ef Alþingi veitir heimild til eignar- eða leigunáms.

Til skýringar má taka fram: Jörðin Garðar er ríkiseign, en er nú í ábúð margra bænda. Garðar eiga frá fornu fari allstórt afréttarland, og er þetta nyrzti hluti þess. Nokkrir sjálfseignarbændur í nágrenni Garða telja sig einnig eiga upprekstur í þennan afrétt. Alls munu það vera 15 ábúendur, sem mega nota afréttinn.

Þótt stærð þessa lands sé um 220 ha, er mikið af landinu blásið, og er þar vart meira en sumarheit 50 kinda. Þess má einnig geta, að fyrrverandi ráðherra, Bjarni Ásgeirsson, gaf á sínum tíma munnlegt samþykki sitt til, að eignarnám færi fram, ef ekki næðist samkomulag við ábúendur.

Var reynt að ná samkomulagi, og um skeið stóðu vonir til, að það tækist, en Guðmann Magnússon hreppstjóri á Dysjum telur slíkt nú ókleift, og mun hann væntanlega staðfesta það með bréfi.

Að fengnu samþykki ráðuneytisins munu þingmenn Reykjavíkur taka málið upp á Alþingi.

Virðingarfyllst,

f. h. Skógræktarfélags Reykjavíkur,

Guðmundur Marteinson.

Einar G. E. Sæmundsen.

Til atvinnuáráðuneytisins.

## Fylgiskjal II.

### ATVINNUMÁLARÁÐUNEYTIÐ

Reykjavík, 20. janúar 1953.

Með skírskotun til bréfs Skógræktarfélags Reykjavíkur, dags. 16. þ. m., vill ráðuneytið taka það fram, að það samþykkir fyrir sitt leyti, að tekið verði eignar- eða leigunámi og lagt til Heiðmerkur um 220 ha landsvæði úr afréttarlandi Garða á Álftanesi sunnan Heiðmerkurgirðingar, sem merkt er á uppdrætti þeim, sem fylgir bréfinu, ef Alþingi veitir heimild til eignar- eða leigunáms.

Hermann Jónasson.

Til Skógræktarfélags Reykjavíkur.